

四庫全書

集部

欽定四庫全書

集部

晦庵別集卷

五至
七

詳校官庶吉士臣朱理

主事臣呂雲棟覆勘

總校官庶吉士臣倉聖脉

校對官中書臣葉蘭

謄錄監生臣鄧培善

欽定四庫全書

晦庵別集卷五

宋 朱子 撰

雜著

釋氏論上

建安吾應植家藏易東潤跋

或問孟子言盡心知性存心養性而釋氏之學亦以識
心見性為本其道豈不亦有偶同者耶朱子曰儒佛之
所以不同正以是一言耳曰何也曰性也者天之所以
命乎人而具乎心者也情也者性之所以應乎物而出

乎心者也。心也者，人之所以主乎身，而以統性情者也。故仁義禮智者，性也；而心之所以為體也，惻隱羞惡恭敬辭讓者，情也。而心之所以為用也，蓋所謂降衷於民有物有則者，儒

闕

也。故其所以盡心知性者，以

其窮理而極乎心之所

闕

之所有者，無不識也。所

謂

闕

養性

闕

已而不失其本

闕

則性

闕

如是，則情之所發亦無不

闕

正而可以

應物於無餘矣

闕

性不見其分

闕

別闕

給之闕

與闕

其闕

指闕

者實在精神魂魄之聚

而吾儒所謂形而下者耳至其所以識心者則必別立一心以識此心而其所謂見性者又未嘗睹夫民之衆物之則也既不睹夫性之本然則物之所感情之所發皆不得其道理於是概以爲已累而盡絕之雖至於反易天常殄滅人理而不顧也然則儒術之所以異其本

豈不在此一言之間乎曰釋氏之不得為見性則聞命
矣至於心則吾曰盡之存之而彼曰識之何以不同而
又何以見其別立一心耶曰心也者人之所以主於身
而統性情者也一而不二者也為主而不為客者也命
物而不命於物者也惟其理有未窮而物或蔽之故其
明有所不照私有未克而物或累之故其體有所不存
是以聖人之教使人窮理以極其量之所包勝私以去
其體之所害是其所以盡心而存心者雖其用力有所

不同然皆因其一者以應夫萬因其主者以待夫客因
其命物者以命夫物而未嘗曰反而識乎此心存乎此
心也若釋氏之云識心則必收視反聽以求識其體於
恍惚之中如人以目視目以口齟口雖無可得之理具
勢必不能不相汝爾於其間也此非別立一心而何哉
夫別立一心則一者二而主者客

闕

分矣而又塊然自守滅情廢事以自棄

君臣父子之間則心之用亦息矣夫

闕

所指以為心性與其所以從事焉者乃如此然則不謂之異端邪說而何哉曰然則其徒蓋有實能恍然若有所睹而樂之不厭至於遺外形骸而死生之變不足動之者此又何邪曰是其心之用既不交於外矣而其體之分於內者乃自相同而不舍焉其志專而切其機危而迫是以精神之極而一旦惘然若有失也近世所謂看心之法又其所以至此之捷徑蓋皆原於莊周承蜩削鐻之論而又加巧密焉爾然昧於天理而特為是以

自私焉則亦何足稱於君子之門哉

釋氏論下

或問子之言釋氏之術原於莊子承蜩削鐻之論其有稽乎朱子曰何獨此哉凡彼言之精者皆竊取莊列之說以為之宋景文公於唐書李蔚等傳既言之矣蓋佛之所生去中國絕遠其書來者文字音讀皆累數譯而後通而所謂禪者則又出於口耳之傳而無文字之可據以故人人得竄其說以附益之而不復有所考驗

今其所以或可見者獨賴其割裂裝綴之迹猶有隱然於文字之間而不可掩者耳蓋凡佛之書其始來者如四十二章遺教法華金剛光明之類其所言者不過清虛緣業之論神通變見之術而已及其中間為其學者如惠遠僧肇之流乃始稍竊莊列之言以相之然尚未敢正以為出於佛之口也及其久而耻於假借則遂顯然篡取其意而文以浮屠之言如楞嚴所謂自聞即莊子之意而圖覺所謂四大各離今者妄身當在何處即

列子所謂精神入其門骨髓反其根我尚何存者也凡
若此類不可勝舉然其說皆萃於書首其玄妙無以繼
之然後佛之本真乃見如結壇誦呪二十五輪之類以
至於大力金剛吉盤荼鬼之屬則甚麓鄙俗惡之狀校
之首章重玄極妙之指蓋水火之不相入矣至於禪者
之言則其始也蓋亦出於晉宋清談議論之餘習而稍
務反求靜養以默證之或能頗出神怪以銜流俗而已
如一葉五花之識隻履西歸之說雖未必實有是事然

亦可見當時所尚者止於如此也其後傳之既久聰明才智之士或頗出於其間而自覺其陋於是更出已意益求前人之所不及者以陰佐之而盡諱其怪幻鄙俚之談於是其說一旦超然真若出乎道德性命之上而惑之者遂以為果非堯舜周孔之所能及矣然其虛夸詭譎之情淫巧儇浮之態展轉相高日以益盛則又反不若其初清閒靜默之說猶為彼善於此也以是觀之則凡釋氏之本末真偽可知而其所竊豈獨承蜩削鑿

之一言而已哉且又有一說焉夫佛書本皆梵字譯而通之則或以數字為中國之一字或以一字而為中國之數字而今其所謂倡咒句齊字偶了無餘欠至於所謂二十八祖傳法之所謂書則又頗協中國音韻或用唐詩聲律自其唐之稍黠如闕洪輩者則已能知其謬而強為說以文之顧服衣冠通今古號為士大夫如楊大年蘇子由者反不悟而筆之於書也嗚呼以是推之則亦不必問其理之是非而其增加詭偽迹狀明白益

無所逃矣宋公之論信而有證世之惑者於此其亦可以少息也哉

釋奠申禮部檢狀

見臨漳語錄

伏覩淳熙六年尚書禮部頒降淳熙編類祭祀儀式內有合行申請事件須至申聞

一神位某近得禮部侍郎王普所著釋奠儀式考其位次爵號皆與此本不同大低此圖自東而西兩兩相對而王氏本自東序一至五次西序一至五又次東廊一

至卅六又次西廊一至卅五次西廊泗水侯孔鯉次東廊沂水侯孔伋遂連中都伯左丘明以下至賈逵又次西廊杜子春以下至王安石詳此次序固不如今圖之善但此圖十哲次序亦有小誤蓋以論語考之當以閔損為第一在東序冉耕為第二在西序冉雍為第三在東序宰予為第四在西序端木賜為第五在東序仲由為第六在西序冉求為第七在東序言偃為第八在西序卜商為第九在東序曾參為第十在西序今迺以冉

雍為第一閔損為第三冉求為第六仲由為第七則亦
誤矣又其爵號王氏本費公為琅琊公鄭公為東平公
薛公為下邳公齊公為臨淄公黎公為黎陽公徐公為
彭城公衛公為河內公吳公為丹陽公魏公為河東公
成侯為武成侯未知孰是又按國朝會要政和間沂水
侯與泗水侯俱封仍同從祀則王氏本為得之而此圖
獨闕泗水委是脫誤其左丘明以下當從此圖兩兩相
對但左丘明當在西廊對孔汲而荀況以下當在東廊

公羊高以下當在西廊兩兩相對與此相反乃為得之耳伏乞更賜詳考改正行下

一祭器並依鼎崇義之禮圖樣式某伏見政和年中議禮局鑄造祭器皆考三代器物遺法制度精密氣象淳古足見一時文物之盛可以為後世法故紹興十五年曾有聖旨以其樣制開說印造頒付州縣遵用今州縣既無此本而所頒降儀式印本尚仍鼎氏舊圖之陋恐未為得欲乞行下所屬別行圖畫鏤板頒行令州縣依

準製造其用銅者許以鉛錫雜鑄收還舊本悉行毀棄更不行用

一釋奠時日注云仲春上丁仲秋下丁某檢準紹興乾道淳熙令並云二月八月上丁釋奠文宣王即無下丁之文又嘗竊見五禮申明冊內有當時州郡申請禮局已改下丁為上丁訖其後又見故敷文閣待制薛弼任杭州教授時所申今到本州檢尋頒降舊本却無此條恐是前後節次頒降致有漏落將來如蒙別行鏤板即

乞先於儀內改下丁作上丁字仍檢申明冊內備錄此
條全文附載篇末以證元本之失仍下州郡有舊本處
並行批鑿改正庶使州縣奉行有所依據

一元本陳設條內著尊四犧尊四著當作犧犧當作象今
來頒降新本已行改正而政和年中頒降舊本尚仍其
舊州縣奉行不無疑惑將來如蒙別行鏤板即具附載
後來改正因依於篇後或只將某此狀全文附載仍下
州郡合將舊本批鑿庶幾明白不至疑誤

一釋奠儀舊本鄒國公下並有舒王字今已刪去而不著其所以然者亦與舊本牴牾將來如蒙別行鏤板即乞檢會靖康年中罷王安石配享先聖章疏指揮並行附載仍下州郡並將舊批鑿

回余衡州啟

秀實衡州之孫師魯家藏

賦祿真祠方遂燕居之適承流巨屏莫回成命之頒顧修問之未遑辱移書之先及恭惟某官受材宏偉涵德粹溫學問有原盡得傳家之奧要文詞甚蔚坐觀作者

之典刑盍升臺閣之聯猶屈江湖之守方慕先賢之治
益觀美化之成鈴閣少留姑慰遠民之意璽書亟下遂
還近侍之班某久仰英猷未諧良覲同寅有望儻分南
服之憂歸賦可期即返東臯之樂

回王正臣啟

見大同集

伏念行能無取藝業不修學不足以見古人之用心徒
極鑽研之力仕不足以行平日之所志第勞刀筆之間
至於典禮義文學之官首誦說講論之事聖言高遠雖

莫究其指歸絕業光明庶有聞於來者過勤厚意貺以華賤仰褒飾之過宜顧省循而何有謹奉啟上謝

回衆解元啟

以下見南康集

竊審待問澤宮登名天府方幸究宣於明詔敢期誤枉於華賤披味以還感藏難喻解元先輩學推庠序行著州閭出膺續食之求足為勸駕之重顧念朝家設科以取士本務得賢然而學者挾策以讀書但期干祿伊欲一新於敝俗不能無望於羣公輒誦淺聞少酬盛禮惟

窮理修身之要當有志於古人則尊主庇民之功庶無
慚於當世

回待補生啟

竊審待問澤宮登名槐市方幸究宣於明詔敢期誤枉
於華牋披味以還感藏難喻然朝家建學養士之意正
為育材而諸生辭家射策之心但期干祿伊欲一新於
敝俗不能無望於群公輒誦淺聞少酬盛禮惟古人為
己之志當有餘師則大學新民之功庶無違教

晦庵別集卷五

欽定四庫全書

晦庵別集卷六

宋 朱子 撰

公移

漳州延郡士入學牒

見臨漳語錄

契勘州縣兩學講說課程近日以來漸有倫緒但以州郡尊賢尚德之心有所未至致使諸生無所薰陶涵養以發其向道入德之趣不敏之咎何以自文今覩新江州知錄黃從事器資渾厚操履端方杜門讀書不交權

利鄉閭有識莫不推高若以禮請屈居州學正錄之任

兼同主管縣學教遵必能使諸生觀感而化有所興起

前州學施學正

允壽

石學正

洪慶

皆以耆艾之年進學

不倦強毅方正衆所嚴憚林貢士

易簡

李進士

唐次

或

究索精微或持循雅飭察其志行以益可觀貢士陳淳

太學生楊

士訓

齒雖尚少學已知方永嘉學生徐寓務

學求師志尚堅確凡此數士當職所知若悉招延異其

禮際則凡學之子弟藏修遊息無適而不得良師畏友

之益庶幾理義開明德業成就仰副聖朝教養作成之意其在外士人竊恐尚有年高德劭閭里推尊經明行修流輩歸重而藏器自珍不求聞達者更當廣行咨訪續議延請紹熙三年正月初二日牒

南康軍請洞學堂長帖

以下見南康集

謹按國朝會要修復白鹿洞書院已差補職事學生入洞管幹訖今按江南野史本洞舊制洞主之外更有堂長名目今觀學錄楊日新年高老成在洞供職紀綱庶

事表率生徒績效可觀合行敦請須至給帖者右給帖
付貢士楊日新準此充白鹿洞書院堂長職事淳熙七
年九月日帖

洞學榜

契勘本軍廬山白鹿洞書院元係唐朝太子賓客李公
遺跡經歷五代號為國庠及至本朝太平興國中嘗蒙
太宗皇帝賜以官書咸平年又蒙真宗皇帝重加修葺
中間廢壞殆且百年今者本軍鼎新建立教養生徒漸

有倫緒又承本路諸司及四方賢士大夫發到文籍收
藏應副學者看讀以至山林田土亦已標簽界至措置
撥買規模一新可垂久遠已具事狀奏聞乞賜敕額去
訖竊慮向後諸色等人不知上件事理輒有毀壞以至
偷盜文籍侵占田土及過往之人妄有搔擾事屬不便
須至曉示者右出榜白鹿洞書院張掛各請知悉淳熙
八年閏三月日榜

申諭耕桑榜

當職二月十五日依準近降指揮守令出郊勸農已印
給勸農文榜并先來勸諭耕種田土勸課農桑及星子
知縣王文林種桑等法文榜發下三縣貼掛曉諭民間
通知去訖續據王文林申到勸諭種田方法尤為詳細
竊慮都建昌縣人戶未能通知今分下兩縣曉示鄉村
人戶仰遞相勸諭依此方法及時耕種用力既勤必有
豐年之報再此勸諭各宜知悉淳熙七年二月

辛丑勸農文

當職昨為本軍民間農事減裂累曾出榜反復勸諭自
從去歲以來凡吾父兄子弟似亦稍相聽信方欲從事
於深耕疾耘之務以冀一飽而當職不德刑政失中侵
迫陰陽招致旱虐使吾父兄子弟終歲勤動而不獲有
秋之望永思厥咎愧負何言尚幸一二父兄皆能率其
子弟當此荒歉之中種麥耕田及時盡力不為輕去墳
墓之計而又賴天之靈宗社之福雨雪應候土潤泉通
麥既可期稻又可種嗣歲之功似已有可觀者而當職

亦幸免於罪戾且將受代而歸矣今以中春之月祇率
典常躬載酒食出郊行田延見一二父兄同舉此觴以
告將別父兄其強食自愛謹身循理以教子弟使之孝
敬父母慈愛骨肉和睦鄉鄰救卹災患輸納苗稅畏懼
公法專心致力於農桑之務如前此勸諭之云者而勿
為飲博遊惰爭鬪論訟一切非理違法之事以陷刑辟
其子孫之敏秀者則又教令講學讀書使知先王禮義
之教既以上副國家長育人才之意而爾之門戶亦將

與有榮焉其前年舊榜及星子知縣王文林耕田種桑法今亦再行給散并此勸諭各宜體悉淳熙八年二月

招學者入郡學榜

惟此邦江山奇秀如此俊茂宜倍於他郡而誦絃之聲寥寥曠絕此長吏教化不明之責也今敦請新臨江軍新淦縣尉某人就軍學傳道堂主盟文社教授總司教條每日講書次日覆三八出題四九日納課擇精勤者書考以示勸無籍者給食有籍者以此差補職事其不

率教者則有規請賢父老勉其子弟努力從事於學尚庶幾以見其成焉

招舉人入白鹿咨目

恭惟國家以科舉取士蓋循前代之舊規非以經義詩賦策論之區區者為足以盡得天下之士也然則士之所以講學修身以待上之選擇者豈當自謂止於記誦綴緝無根之語足以應有司一旦之求而遂已乎今歲科場解發赴省待補之士二十有八又文行彬彬識者

蓋稱之郡亦與有榮焉然惟國家之所以取士與士之
所以為學待用之意有如前所謂者是以更欲與諸君
評之今白鹿諸生各已散歸山林閒寂正學者潛思進
學之所諸君肯來當戒都養給館致食以俟專此咨白
可否須報

勸農民耘草糞田榜

雨水調勻田苗茂盛仰人戶及時耘苗拔去草根多用
土糞如法培加已帖知佐月半以後不測下鄉點檢將

田中有草無糞之人量行決罰的無輕恕六月六日

勸諭趁時請地種麥榜

契勘秋來久旱晚田失收茲幸得雨可種二麥今勸人戶趁此天時多耕闊種接濟口食其有無地可耕之人及有力多而地少者仰自踏逐空閑官地具出字號四至畝角經縣陳請布種當與判狀執照免料權給一年其有情願永遠請佃之人亦仰分明聲說即與給據管業特免五年稅料即不得因而侵占他人見耕田地及

廣行包占狀外官地頃畝如有違犯許人陳告當以狀內所請地及見種子利充賞本人仍別科罪除已行下三縣照應施行外須至曉諭約束者

右榜勸諭人戶請詳此事理趣時多種二麥量力請佃官地務盡人力以相天功庶幾來年不至闕食淳熙六年九月

放官私房廊白地錢約束

照對日今天色亢陽見行禁止屠殺祈求雨澤未獲感

應竊慮細民不易所有官私房廊白地錢自七月初二日為頭五十文以上放五日五十文以下放十日

措置賑卹糶糴事件

竊見軍境久闕雨澤深慮細民將來艱食合預行招誘客販米船就軍出糶并勸誘上戶停蓄以備饑急措置事件下項

如遇客販米到岸欲就軍出糶仰赴務陳狀看驗稅物訖令就石寨內捐泊出糶即與免在城稅錢三分或有

糶不盡之數欲載往它處須再經本務出給關引方得
起離前去庶可闕防欺隱透漏之弊今帖城下稅務遵
依施行

尋常客人糶米必經由牙人方敢糶常被邀阻多抽牙
錢是致不肯住糶合嚴立榜賞上約許從民旅之便情
願交易庶得牙人不敢搔擾使軍今立賞錢一千貫文
榜市曹張掛曉示如遇客旅興販米斛到軍聽從民旅
之便自行糶糶如牙人不遵今來約束輒敢邀阻解落

牙錢許被擾人晝時具狀經使軍陳訴切待勾收犯人重行勘斷追納賞錢入官施行

米船到岸雖欲出糶然貧民下戶不過斗糶卒難轉變錢物未免畱滯須當勸諭上戶及時收糶不惟他時可濟荒歉於傳蓄之家豈無宜利可謂兩便合帖委官敦請上戶說諭

措置兩縣到岸米船事

照對旱傷細民闕食合行出糶常平米斛應接細民食

用切慮向去日久有誤不測賑濟況今鄰郡州縣收成
正是客旅興販米斛之際本軍已行措置不行收稅仍
放免本船雜物稅錢招納米船住岸出糶接濟民戶日
食其兩縣務亦合依此措置招誘米船候有米船到岸
即將常平米斛住糶準備將來支用七月十一日帖都
昌縣

招誘客販米斛免收力勝雜物稅曉諭

照對本軍并管屬縣近日以來闕少雨澤見今祈禱未

獲感應米價漸高本軍已行下城下稅務都建昌縣招誘客販米斛前來從便住糶免收力勝雜物稅錢不得邀阻減剋牙錢之類外竊慮客人未能通知須至曉諭并帖縣依此施行七月十五日

再勸修築陂塘

契勘今歲旱傷蓋緣人戶不修築陂塘積水灌漑田禾致令乾死使軍已節次行下三縣及散榜給印榜曉示人戶陂塘淺漏處亦合併力開掘修築如有欠闕工料

支費并諸軍縣借米喫用修築次年送納如陂塘廣闊
費用工力數多亦當計料工食申軍切待具申提舉衙
撥米借貸

措置客米到岸民戶收糶不盡曉諭

照對管內田禾多有旱損切恐民間闕食已措置令稅
務多方招誘客人米船住岸出糶接濟民間收糶食用
與免收納雜物稅錢今來漸有客旅興販米斛到來如
有民戶收糶不盡之數許令牙人并有餘之家收糶停

頓準備接濟合行出榜曉示

曉示鄉民物貨減饒市稅

照對近城鄉民全藉將些小係稅之物入城貨賣辦糶
口食若依遞年收稅切慮無從所出合將客旅步擔興
販紗帛藥草絲綿雜物依舊收稅外其餘鄉民應有些
小土產物貨入城轉變並與減饒三分之一合行約束
不得因而作弊

約束不許偷竊米穀

照對三縣管下田禾雖是旱損其間有水源及可車戽
去處今來漸次成熟切慮有不守行止之人聚集偷竊
禾穀合行下巡尉司嚴行禁約

約束諸縣泛催官物各給憑由

訪聞逐縣尋常文引勾追欠戶更不於引內批鑿少欠
是何年分官物名色若干數目泛稱積年拖欠及追人
戶到官多是人吏作弊不問所欠多寡例將斷罪是致
小民憂疑不能安迹合行下諸縣約束如有人戶少欠

官物各給憑由明言批鑿所欠是何年分官物立限給付少欠之人依限赴官送納

免流移民船力勝

照對有流移之民船至軍岸合行下稅務審實並與蠲免力勝放行

禁旅店不許遞傳單獨

訪聞管下旅店遇有單獨因病或流移之人到店多是慮其死亡更不容畱遂行遞傳驅逐出界因此喪命合

行下諸縣多印榜文於旅店約束遇有過往單獨飢餓
困病之人即仰所到店戶不得遞傳扛擡送出外界許
就便米場驗實量給口食臨安痊日遣去萬一有死亡
之人即時報都保審實申縣行下如法埋葬

取會管下都分富家及闕食之家

契勘管界久闕雨澤田禾旱損使軍已行委官措置招
誘客人興販米斛蠲免力勝雜物稅錢禁戢減剋牙錢
之弊勸諭前來出糶目今日逐有米不闕軍司亦已行

帖都建昌縣及委官依使軍所行措置招誘客米赴縣
住糶及勸諭上戶將所有米斛相各逐鄉村開倉依時
價出糶應接民間食用去訖切慮向去富實戶將米斛
停頓不行出糶使細民闕食不便合行立式預先委官
取會管下都分蓄積米穀上戶及闕食之家如後七月
十六日

某都共幾家

一富家有米可糶者幾家除逐家口食支用供贍地客

外有米幾石可糶

鄉例糶數即依鄉例

開客戶姓名米數

併佃地客姓名

一富家無餘米可糶者計幾家而僅能自給其地客佃

客不闕仍各開戶姓

併佃地客姓名

一中產僅能自足而未能盡贍其佃客地客者計幾家

開戶名取見佃客地客姓名所闕之數

一下戶合要糶米者幾家

作田幾家各開戶名大人幾口小人幾口

別經營甚業次

不作田幾家各開戶名大人幾口小人幾口

經營甚業次

作他人田幾家各開戶名係作某人家田大人幾口小

人幾口

魚經營
甚業次

右件如前竝是着實即無隱漏其闕食之家亦無詐冒
重疊仍五家結一保如將來使軍委官審實挑覆却有
不實去處甘伏重罪不辭

施行旱傷委官驗視

照會本軍并管屬星子都昌建昌三縣自六月以來天
色亢陽闕少雨澤田禾乾枯本軍恭依御筆處分嚴禁

屠宰精意祈禱及行下諸縣精加祈禱去處今據星子
都昌建昌三縣申依應遍詣寺觀神祠及諸潭洞建壇
祭祀請水精加祈禱雨澤竝無感應今來諸鄉早禾多
有乾損及備據稅戶陳德詳等狀訴所佈田禾緣雨水
失時早禾多有乾稿不通收刈申乞委官檢視本軍今
檢準淳熙令諸官私田災傷秋田禾以七月聽經縣陳
訴至月終止本軍酌立規條施行及具奏聞申省部監
司外須至出榜三縣管屬鄉村都保各仰通知

以上七月十六

日

施行旱傷住催官物一月

契勘本軍三縣遭此旱災早禾乾損已出榜曉諭人戶
依期投訴旱狀將來檢踏奏減秋稅外有去年秋糧零
欠甚多及今年夏稅全未納及分數緣其所欠並係起
發上供及本軍軍糧之數雖是今年旱田不熟在法無
緣免放然而訪聞諸縣催科無術不免決撻保長搔擾
人戶當此闕雨之時深慮重困民力除已行下各住追

催一月免致保長人戶奔走期限例遭刑責費去車水工夫今仰人戶各體此意遞相告報於住催一月限內自備所欠錢糧各赴倉送納上以應副官司起發綱運供贍軍兵下亦使本戶不被追呼得以一意車水救田別作營求用備將來闕食之患公私兩便各仰知悉

諭上戶承認賑糶米數目

契勘本軍管下今歲旱傷田禾切慮細民闕食使司已行下三縣推舉管下富實有米上戶并自能贍給地佃

客富家姓名各家見蓄米穀數目或有田產而不多或
無田產却有營運蓄積米穀錢物之家敦請赴官以禮
勸諭承認賑糶米穀數目申軍所委官并三縣勸諭到
上戶承認賑糶米共七萬三千二百六十八碩五斗已
檢準前項條令出給公據付人戶收糶米斛回軍賑糶
在城上戶二十五名共認賑糶米一萬一千六百三十
五碩每升價錢一十七文足

星子縣勸諭到上戶三十一名共認賑糶米一萬一千

九百三十五碩每升價錢一十七文足

都昌縣勸諭到上戶五十九名共認賑糶米二萬八千九百八碩五升每升價錢一十四文足

建昌縣勸諭到上戶九十一名共認賑糶米一萬八千碩每升價錢一十二文足

約束鋪兵

本軍蓋緣旱傷遂置歷及黃旗綠匣急速前去兩縣追會旱傷事件須管遵依台判日限時刻仰鋪兵連夜走

傳至縣仍仰本縣於歷內批鑿承受日時手分姓名即時依限回報亦仰批發離縣日時責付鋪兵連夜依限赴軍投下以憑稽考違滯去處根究重作施行

檢坐乾道指揮檢視旱傷

使軍照對管屬星子都建昌縣人戶陳訴秋田旱傷使軍已立式出榜三縣曉示人戶赴縣投帳繳申使軍切待依條差官檢視減放苗米所有近水鄉分可以車戽注蔭得熟田段切慮人戶將旱傷田段滾同得熟之田

影帶披訴今檢準乾道六年六月二十七日勅戶部曾
尚書劄子奏契勘州縣每遇災傷依法聽人戶經官陳
訴差官檢視蠲放稅租訪聞近來往往多被豪戶計囑
鄉司將豐熟去處一例減放其實被旱澇去處所委官
憚於往來檢視則貧乏下戶不得蠲減臣愚欲望聖慈
特降睿旨委諸路漕臣散出文榜於鄉村曉諭應有災
傷去處仰民戶依條式於限內陳狀仍錄白本戶砧基
田產數目四至投連狀前委自縣官將砧基點對坐落

鄉村四至畝步差官覈實檢放如輒敢妄移豐熟鄉分
在旱傷地分僥倖減免許諸色人陳告依條斷罪仍將
妄訴田畝並拘沒入官以一半給告人充賞施行若州
縣奉行減裂從漕臣按治重寘典憲取進止六月二十
七日三省同奉聖旨依魚照檢踏災傷在法差官同令
佐詣田所先檢見存苗畝次檢災傷田段合委官前去
三縣鄉村究實得熟田段具帳申軍已行帖出榜星子
都建昌縣約束人戶從實投帳以備差官檢放如有將

得熟田段影帶披訴却致被人戶陳告定依條斷罪追賞施行

施行下諸縣躬親徧詣田段相視

使軍契勘今歲三縣田禾旱傷間有邊臨山源溪澗或有得雨去處自熟田段其稅賦合全行輸納又有邊臨大港并有積水陂塘可以車戽接救田段皆是人戶自入夏一乾之後合家老幼舉債辛勤用工車水救得其禾稻十中只有三五分熟者即行比倣自熟之田究見

其數斟量輕重別作一等優卹兼有無水車戽全然旱死田段切慮人戶將來一概投訴旱傷欲將各縣鄉分分委縣官趨此未曾收刈之際躬親下鄉遍詣田段地頭親自相視仍關叫耆保并人戶指證供給罪賞攢類開具供申

禁戢人從不許乞覓

使軍照對所委官下鄉切慮將帶合干等人因而生事乞覓搔擾事屬不便合令縣給口食與隨行人不得搔

擾保正寺觀等人仍立賞降給文榜付檢旱官隨行張掛約束

放免官私房廊白地

照對星子都建昌縣軍自六月以來天色亢陽闕少雨澤見據人戶經軍縣陳訴旱傷切慮細民不易理宜寬卹所有人戶承賃官私房廊白地錢自八月初一日為頭以十分為率權行減免二分候至來年麥熟日仍舊諭人戶種蕎麥大小麥

仰人戶趲此雨潤多種蕎麥及大小麥接濟食用

施行人戶訴狀乞寬

據學生馮椅劄子述照對今歲旱荒民戶已是投詞呈
子見行委官檢踏其在都昌舊來踏旱之弊名色非一
不敢不以告者凡押旱狀官中所收則謂之醋息錢直
日司乞寬則謂之接狀錢已下案案吏乞寬則謂之買
紙錢及投旱帳則謂之投帳錢官員下鄉檢踏供帳民
戶着押社司乞寬則謂之着字錢檢踏官員隨從人吏

於保正名下乞覓則謂之俵付錢官司行下蠲放所納
米斛社司隨斗數數乞覓則謂之苗頭錢凡此之類皆
蠹民之尤者官中所放本以裕民而民之糜費乃至於
是人戶既已困窮坐受其弊無力赴愬委實切害合行
下星子都建昌縣嚴行約束及出榜各縣門并檢踏官
隨行張掛曉示人戶知悉如合干人依前乞覓前項逐
色錢數仰人戶不以早晚具狀經縣陳訴從本縣拘收
犯人申解軍切待根勘依條施行各令知

施行專欄牙人不許妄收力勝等錢

照對本軍近出榜於上江州軍曉諭客販米斛前來從便住糶免收力勝雜物稅錢及約束不得邀減牙錢之類外切慮牙人并稅務專欄不依先來約束仍前收納力勝等稅錢及牙人妄有邀阻減剋牙錢之類今立賞錢三十貫文省榜市曹并稅務檢稅亭張掛曉示客人知悉廣行興販米斛前來出糶贏落利息如稅務專欄等人并米牙人輒敢收納力勝等稅錢及邀阻減剋牙

錢之類仰各人不以早晚具狀赴軍陳論切待追收犯人斷罪追賞施行

禁豪戶不許盡行收糶

照對本軍管下今歲旱傷訪聞目今外郡客人興販米穀到星子都建昌縣管下諸處口岸出糶多是豪強上戶拘占盡數收糶以待來年穀價騰踴之時倚收厚利更不容細民收糶事屬未便如遇客人販到穀米仰上戶不得獨行拘占盡數收糶許細民皆得從便食用

管下縣相視約束及開三項田段

使軍契勘在法檢視災傷先檢見存苗畝次檢災傷田
段蓋欲趲得人戶未及收刈之際略見荒熟大概的實
分數然後豁出熟田細檢荒旱去處不致猾吏姦民通
同作弊本軍近緣荒旱檢坐上項條法行下諸縣遵依
施行除星子知縣王文林躬親下鄉兩日之內多歷都
分見得荒熟田段分明民間咸樂其來不以為擾都昌
權縣孫迪功亦已申到躬親行視所見災傷等第人情

苦樂皆有條理獨有建昌一縣地里稍遠未據申到却
訪聞得本縣官吏誤認法意欲將熟田一坵一角逐一
看視委是繁碎不惟重擾災傷人戶亦恐枉費日月不
能了辦合行約束

且如一坂之田大約百坵內有三五十坵成熟即指定
是何人田段約計畝角抄入熟田數內不在將來檢放
之限如一坂百畝只有一二十畝稍稍成熟即不須逐
畝抄割畱與人戶充收半藁口食仍令人戶一面收刈

犁翻種麥量畱根查聽候檢放或有田面大概黃熟而其中有未出者有出而青空者有出而白死者並係荒損然其根查却與熟田無異切恐將來收刈之後誤被抄入熟田數內不得檢放尤為不便今請便行貌約多少定下荒熟分數令人戶一面犁翻種麥如今來所檢熟田數內將來續有死損即仰人戶量畱穗穡候檢早官到別行陳訴續與檢放

乞行下江西從便客旅興販米穀

契勘本軍并管屬諸縣今歲旱傷全藉江西豐熟州軍
客旅興販米斛出糶接濟細民本軍已行散出文榜招
誘興販前來與免附載雜物稅錢行下城下稅務約束
及出榜曉示米牙人不得減剋分文牙錢令客人自行
出糶切慮向上州軍阻節不令穀米下河致使客旅不
通及間有興販米穀舟船州軍妄以雜物為名倚收稅
錢是致商賈不肯搬販米穀前來出糶細民失望為害
非輕欲望鈞慈速賜行下江西豐熟州軍許令商賈從

便興販米穀向下以來出糶應接民間食用仍乞嚴行
禁戢場務不得妄作名色收納稅錢庶得客旅通行米
價不致騰踴

約束米牙不得兜攬搬米入市等事

契勘諸縣鄉村人戶搬米入市出糶多被米牙人兜攬
拘截在店入水拌和增擡價值用小升斗出糶贏落厚
利遂致細民艱食情實切害合行約束

約束質庫不許關閉等事

契勘質庫戶平時開張庫店典質錢物利息所入不為
不多纔值旱傷歲時輒以闕錢關閉邀阻遂至細民急
切闕用無處質當兼目今闕雨澤城市古井多被有錢
之家拘占夾欄不令衆人汲運情理切害合行告示約
束施行

戒約上戶體認本軍寬卹小民

契勘本軍并諸縣今歲旱傷民間理宜寬卹今訪聞乾
道七年放債豪強之家為緣旱傷人無以償多被強取

去猪羊以至入其家搜奪種子豆麥之類及抑令將見住屋宇并桑園田地低價折還人無所歸遂致流移有至今尚未能歸業之人本軍雖行下三縣曉諭上戶體認本軍寬卹之意量度欠債人戶如粗有收成有力可還之人隨宜取索外其貧乏之人見闕口食委實無可償還仰上戶且與寬容俟民力少蘇却行取索如將來人戶恃頑不還官司即為理索外上戶乘此旱傷細民闕食之際強以此小錢作合子文字借貸遂空頭年月

價貫立契字未及踰時即行填掇預先月日經官投印
及有吞圖婦女顧充奴婢致細民受苦不一理合禁約
施行張廷諫訴旱傷事

據學生張廷諫劄子述夫旱暵之歲朝廷檢收秋苗成
法具在而上中等戶無不力陳必求其放免而後已縱
使官吏有弊亦須及半下戶無力陳告憚於所費故皆
不投帳守令慮不及此則有帳者次第減放無帳者多
至全催糧食之儲既絕望於其前追租之吏又驅迫於

其後回視屋宇器皿布帛不可食者皆不可售進退皇
皇朝暮不能相保今若不待投陳檢視凡下等之苗先
此全免放則見存者其志益堅而已逃者各思反其鄉
里矣遂行下當縣取會五斗以下米單名申軍不待檢
視先次並與除放施行

施行邵良陳訴踏旱利害

使軍今照近據管屬星子都昌建昌三縣人戶陳訴田
禾旱傷已帖委縣官躬親下鄉先次檢視熟田具帳供

申去後據進士邵艮劄子竊見官吏下鄉檢視田段略
不問及人戶旱傷去處惟於每戶帳狀供具所熟田畝
亦不問所熟分數但勒令供作全熟田段鄉民不知官
吏深意皆相顧駭惑夫都昌田禾例宜旱秔非若星子
早田十居七八安有五月中旬一雨至今而有全熟之
理雖陂塘脚下及近容水去處間有熟者然賴車戽之
勤所得不償所費而又如此便利去處其實無幾且以
所居一都言之惟麥坊劉坊大寧余于之旱為尤慘雖

或一二分熟者然大概顆粒不收然則熟田實不能當
旱田二十分之一誠恐官司它日以所供熟田多少而
定通放秋苗分數則些少熟處適所以累及早傷之家
有大不均之病聞之鄉老皆以為今歲之旱酷於辛卯
蓋彼時人家尚有歲備自夫一旱之後加以連年暗折
入間例無蓋藏自前月來鄉曲上戶小民流離已覺相
踵且今此正收刈之際人家尚有一二分早禾可恃而
已如此者雖亦糊口迫之誠以催科之窘且深為後日

慮而畫此至無賴計耳比年以來都昌上戶多為小人
誣賴故闕乏之際有力之家至不敢與交易由是貧乏
下戶愈覺坐困而無告今鄉曲猶未雨油麻粟豆並烏
有赤地未耕二麥且有失時之慮嗣歲之計彼將何措
此蠲租之惠尤鄉民之所深望也昔唐制旱七分租庸
調皆免被三分之收非不知取捐之蓋有深望也本軍
遂作訪聞行帖三縣檢視官約束

委官置場循環收糶米斛

照得本軍管界久闕雨澤旱死田禾目今在市闕米出
糶切慮細民闕食合行借撥官錢委官就軍置場措置
循環收糶米斛出糶應脩細民食用

約束遊手不許脅持良民

契勘今歲旱傷委官下鄉檢踏成熟田段外有旱田人
戶一面犁翻種麥量畱根查聽候別有官前來檢收切
慮遊手脅持之人見人戶旱田已經犁翻耕種妄作鄉
村虛聲首熟欺詐乞覓使善良人戶不敢犁翻以至種

麥失時不能安業今仰人戶知悉若實有旱田即依條
量畱根查以備檢放一面犁翻種麥免致失時如有似
此脅持妄稱陳訴欺詐之人仰被擾人戶經官陳理切
待追取送獄根勘斷罪施行

援例乞撥錢米

照對本軍今歲旱傷細民闕食已行下星子都昌建昌
縣委官抄劄合賑糶賑濟戶口人數申軍及照得乾道
七年旱傷係蒙提舉常平使司支撥到池州太平州蕪

湖繁昌等縣常平米五萬碩差官管押前來本軍分撥
下三縣賑糶賑濟遂具申常平提舉使司乞支撥米斛
差官管押前來本軍賑糶賑濟續蒙提舉使司支撥信
州貴溪縣常平米五千碩差人前去搬取及支撥池州
常平錢五千貫省付軍收糶米斛賑糶

再諭人戶種二麥

使軍累行勸諭人戶耕種二麥蓋為今年荒旱不比常
年須是併力加工救濟性命今訪聞多有未施工處顯

是頑慢已帖檢旱官并行催趣將頑慢惰農之人量行
決罰先此曉諭各仰知悉

行下三縣抄劄賑糶人戶

照對近委官抄劄三縣管下賑糶人戶姓名大小口數
申軍尋將已申到帳拖照得合賑糶人戶並不見聲說
見住地名去處恐有漏落增添情弊難以稽考合行下
逐縣將逐都塌畫地圖畫出山川水陸路徑人戶住止
去處數內不合賑糶人戶用紅筆圈欄合賑糶人戶用

青筆圈欄合賑濟人戶黃筆圈欄逐一仔細填寫姓名
大小口數令本都保正長等叅考指實繳申切待差官
點摘管實

行下三縣置場

照對見委官抄劄三縣賑糶賑濟人戶大小口數畫圖
結申務要實惠及民無致妄冒所有置場去處委官酌
量地里遠近分定置場去處各縣水陸地里若干其勸
諭到上戶賑糶米斛亦合撥隸近便赴場去處以憑施

行續據三縣申置場共三十五處

星子縣置場七處 都昌縣置場十一處 建昌縣置
場一十七處

約束許下戶就上戶借貸

契勘今歲旱傷非常得熟處少本軍已節次行下三縣
散榜曉諭人戶趁此土脉未乾并力耕墾廣種二麥接
濟將來食用如有惰農耕種失時之人即請照已行榜
示行遣其貧乏無種糧之家請諭上戶借貸如要官司

文歷卽印給令上戶收執遇有下戶借貸麥種糧食卽令就歷批領將來還足對行勾銷如有不還官為理索

再諭上戶卹下戶借貸

契勘今年荒旱非常得熟處少本軍多方救卹務使人戶不至飢餓流移及行勸諭人戶多種二麥接濟喫用非不叮嚀當職近因出郊相視陂塘見得麥田多有未施工處蓋緣人戶打穀未了亦是官司勸諭未至其得熟處不闕種糧可以佈種然其人既無飢餓之憂便乃

懶惰其荒旱處合更勤苦又以難得糧種遂致因循今
仰人戶速將所收禾穀日下打持起此土脉未乾并力
耕墾其高田堪種麥處即仰一面種麥其水田不堪種
麥處亦仰起早耕翻多着遍數務要均熟庶得久遠耐
旱宜禾其得熟人戶當念幸得收成常生慚愧不可便
致惰怠起此餘力多種二麥將來可以博得他處物貨
其遭旱人戶當念既遭此難尤當勤力多種食物方可
養贍老小不致飢餓流移其下戶無種糧者上戶當興

憫惻之心廣加借貸目今施惠既可以結鄰里之驩將來收成亦自不失收息之利庶幾過此荒年各保安業今恐前來勸諭未明再此榜示仰人戶知悉

革住米船隱瞞情弊

契勘賑糶場收糶米斛如遇米船到岸內過稅船隻收糶三分住糶米船止糶一分其住糶米船法格並與免收稅錢外訪聞客旅多生奸猾動是數隻到岸於內却將一兩隻作住糶結計在市米牙人令其虛解牙錢稱

就市糶訖却將在船住糶米斛夤夜搬往過稅船內隱瞞官司合行出榜約束

行下場所單住米船隱瞞

照得賑糶場近緣住糶米船客人結計牙人虛解牙錢夤夜搬傳米斛往過稅米船之內隱瞞官司有此欺弊遂出榜河岸約束今來尚慮住糶客人雖依曉示在市出糶切慮關防不盡合行下本場自今後遇有住糶米船即令城下稅務看驗具數關報賑糶場本場權住出

糶令客人搬米赴場從本場差人監用本場升斗自行
出糶接濟細民日報糶過米數糶足為給關子放行庶
幾杜絕隱瞞官司之弊

申提舉司將常平米出糶

契勘本軍今歲旱傷細民闕食遂行下三縣抄劄到合
賑糶賑濟戶口人數已行措置賑糶賑濟所有本軍城
下常平倉見椿管在倉米八千八百九十三碩二斗六
升五合二勺除今年八月內盤量欠折米一千六十碩

三斛二升四合外實管見在米七千八百三十二碩九
斛四升四合八勺係是乾道八年以後逐年收糴到數
目價錢不一其米今年在廩內有結冒陳損兼照今年
七月內管屬建昌縣闕少米斛出糴所支撥義倉米估
價應接民間食用每升計價錢一十文足已具收報提
舉使衙照會去訖所是見管和糴米本軍今追到牙人
沈先等供具其米經年陳損與受納到人戶義倉米陳
損色樣一同依市價每一升估計價錢一十文足本軍

照得上件米係是當來委官和糴到數目切慮虧損元價未敢擅使出糴具狀申提舉使衙照會依目今所估價直賑糴應接民間食用庶幾飢民不致流移

行下置場不許畱滯客旅

契勘本軍今歲旱傷細民闕食雖移文江西州縣通放到客米舟船又慮牙鋪解落及市民日糴數少阻滯客旅不便遂行委官置場支撥官錢依市價兩平交量收糴客米以備賑糴應接細民食用今訪聞得本場每遇

客米到場中糶更不即時交量及至交量又不即時支還價錢切慮合干人因而作弊畱滯乞覓錢物合行約束限當日交量即時當官支結價錢如違將犯人勘斷

行下兩縣委官捉人戶糶米減尅

契勘管下今歲旱傷細民闕食使軍遂措置支撥官錢差人前往外州縣收糶到米分撥兩縣出糶訪聞合干人將人戶所糶米並不依實支量公然作弊減尅今委逐縣知縣縣尉每日不測捉人戶所糶米三兩戶當官

覆量如有少數即根究解人赴軍

申諸司乞行下江西不許遏糴

契勘本軍并管屬諸縣今歲旱傷最甚細民闕食及無
米支遣軍糧遂多方借兌官錢差撥公吏前去江西得
熟處州縣收糴米數回軍賑糴支遣及檢準淳熙令災
傷官司不得禁止搬販及近降指揮州縣不許閉糴如
有遏糴州軍許鄰州越訴及準今年八月十九日聖旨
節文江東安撫使陳少保奏今歲災傷先合措置通放

米斛州縣有遏糴去處許行越訴本軍遂節次備坐移
文隆興府照會收糴去後已承回報行下諸縣許令本
軍所差人收糴米穀放行今却據差去公吏呂棋狀申
在本軍建昌縣管下二陂山田等處四散收糴靖安新
建縣鄉人米斛欲裝上船覩奉新縣尉司弓手五十餘
人各持鎗棒沿江巡綽不容裝發米斛又被奉新縣差
人越界釘斷建昌縣管下三陂潭德文口陂水把截不
放船隻上下往來已申建昌縣差保正隅官防護所糴

米船今於十月二十四日被奉新縣差弓級徐成等部
領弓手保正等於要路把截不容鄉人搬糴米穀申乞
施行本軍今照差去公吏呂棋係在本軍建昌縣界收
糴靖安新建縣管下米穀其奉新縣官吏公然違戾見
行條法及不遵今年八月十九日專降聖旨指揮輒差
弓手持鎗棒沿河巡緝不容收糴又差人越界前來建
昌縣管下三陂把截釘斷水口不惟本軍所糴米穀百
端攔遏不行通放有悞賑糴支遣至於客販米穀舟船

亦不得往來公私利害至重移文隆興府并江西轉運
司照詳前項條法指揮請將奉新官吏按劾仍通放米
船并申諸司行下隆興府通放本軍所糴米船并申御
史臺乞依近降指揮彈奏施行

晦庵別集卷六

欽定四庫全書

晦庵別集卷七

宋 朱子 撰

公移

申倉部及運司檢放三縣苗米數

本軍照對管屬星子都昌建昌三縣自六月以來天色
亢陽闕少雨澤田禾乾枯本軍恭依御筆處分嚴禁屠
宰精意祈禳及行下諸縣精加祈禳去後續據星子都
建昌三縣申依應遍詣寺觀神祠及諸潭洞建壇祭祀

請水精加祈禱雨澤並無感應今來諸鄉早禾多有乾損及備據稅戶陳德祥等披訴所布田禾緣雨水失時早禾多有乾槁不通收刈申乞委官檢視除放苗米本軍除已依條行下諸縣令人戶供投土段文帳差官檢視及於七月十六日具錄奏聞并申朝省及諸監司照會施行遂選差委迪功郎司戶參軍毛大年前去星子縣及委迪功郎星子縣主簿李如晦前去都昌縣及委從政郎司法參軍陳祖永前去建昌縣同逐縣知縣躬

親詣旱傷田段地頭逐一對帳檢視續據所委官具到
已檢放過人戶災傷田段共放過米三萬七千四百五
十碩一斛二升三合一勺申軍本軍今照星子都昌建
昌三縣淳熙七年分管催人戶苗米四萬六千五百一
十九碩六斛五升四合五勺四抄七撮數內除豁所委
官檢放過米共三萬七千四百五十碩一斛二升三合
一勺統均計放八分以上外實催米九千六十九碩五
斛三升一合四勺四抄七撮本軍已具奏聞乞存留上

件米支遣官兵外今開具諸縣檢放實催米數下項合具狀供申行在尚書倉部及申轉運司使衙照會

星子縣管催米六千五百三十石七斗三升二合六勺已委司戶毛迪功同知縣王文林下鄉檢視

檢放米五千三百六十八石七斗二合一勺檢放計八分一釐二毫

先放五斗以下四百石三升二合七勺所委官檢踏放四千九百六十八石六斗九合四勺實催米一千一百

六十二石六斗六升五勺

都昌縣管催米一萬九千七百七十五石五升一合四勺八抄七撮已委星子縣主簿李迪功同權縣孫迪功下鄉檢視

檢放米一萬六千八十四石二斗七升一合放八分一釐三毫四系先放五斗以下一千八百六十四石八斗七升七合

所委官檢踏放一萬四千二百一十九石三斗九升四

合實催米三千六百九十石七斗八升四勺八抄七撮
建昌縣管催米二萬二百一十三石八斗七升四勺六
抄已委司法陳從政同知縣林宣教下鄉檢視

檢放米一萬五千九百九十七石七斗八升放七分九
釐一毫五系先放五斗以下米五百四十一石六斗七
升

所委官檢踏放一萬五千四百五十六石一斗一升
實催米四千二百一十六石九升四勺四抄

糶場印式

入門訖監

押

交錢訖監

押

支米訖監

押

不到監

押

係糶米人不到於簿歷上用此印

交錢若干訖監

押

依數支米訖監

押

號式用青絹印

某場監官隨行人吏某人斗子某人入門使押

夾截糶場交錢量米處

窓

交錢處

裏門

量米處

門

總簿式

使軍

今給總簿一面付某縣某場照給賑糶

歷頭賑濟牌子仰照此字號批鑒牌歷對填米數給付
人戶今就此簿交領逐次糶濟訖用支訖印於本日窠

眼內其糴不足者實填所糴米數候結局日繳申年

月 日 給

天字牌某都某保某人逐次請糴米若干訖姓名押

正月一日 六日 十一日 十六日 廿一日 廿六日

二月一日 六日 十一日 十六日 廿一日 廿六日

三月一日 六日 十一日 十六日 廿一日 廿六日

牌面印紙式

某縣某鄉第 正月一日 六日 十一日 十六日 廿一日 廿六日

都人戶

二月 日 十日 十日 十日 廿日 廿六日

五日一次赴

三月 日 十日 十日 廿日 廿六日

場請賑濟米

閏月 日 十日 十日 廿日 廿六日

使

押

牌背題字式

縣給付

都官

押用縣印

字號監

押

賑糶歷頭樣

使軍

所給歷頭即不得質當及借賣與不係今賑糶之人如覺察得或外人陳告其與者受者並定行斷罪

今給歷付縣鄉都人戶

大人一口小兒口每五日賞錢赴收糶

如糶米大人一升小兒半升

如糶穀大人二升小兒一升

並五日并給閏三月終止

右給歷頭照會淳熙八年正月

日給

使

押

正月初一日

正月初六日

正月十一日

措置賑糶場合行事件

照對管屬今歲旱傷尤甚細民闕食使司已措置委官
抄劄到闕食戶口及勸諭上戶承認賑糶米斛并支常
平倉見管米斛合自淳熙八年正月一日為頭賑糶賑
濟至閏月終住

糶支外令施行下項

一差寄居見任指使添差酒稅監押監廟官三十五員
前去各縣逐縣監轄賑濟及要各縣當職官分場巡察
不得容令隨行人并保正長作弊并監轄糶官每月支
見任官食錢二貫文米六斗寄居官錢三貫米一石并
逐場差撥人吏共三十五名每月支食錢一貫五百文
米三斗

一使軍置造入門并交錢訖支米訖不到交錢若干訖

依數支米訖印子各六枚各三十五箇并合干人青絹號云某處監官隨行人吏某斗子某人使押并置造升斗委官較量及簿歷給下逐場交管行使

一印給賑濟戶歷頭并賑濟人口牌面發下三縣交管於賑糶賑濟前一月出榜曉示人戶定某日前來本場請領歷頭牌子出榜後半月委各場監官就本場當官審實依總簿內十字文號批鑿牌歷給付人戶附簿交領

一見置場賑糶米穀合於賑糶賑濟前十日勒逐都保
正將置場處用棘刺夾截作兩門兩重極小只通一人
來往外門之內裏門之外須極寬可容一場賑糶賑濟
人外門之側為一憲後夾截交錢位子一間依使軍立
去樣式告示保正夾截

一見措置下場賑糶濟米穀所有船運及支破擔脚仍
鈐束合干人不得減刻斛面

官司米穀並前一日般赴場監官交足上戶米令各家

自用客津般每石三十里外支米三升三十里內二升
十里內一升其米就所糶內支官給價錢還上戶如米
去場五里內即就各家見安頓監糶

官米陸路即仰保正輪差能擔擎糶米人戶搬送每石
依上項計里數支雇米水路即本縣和雇人船裝錢比
陸路減半支其人船食米並於官錢內支使賑糶米穀
一月分六次出糶常平米切慮內有去置場處稍遠般
運艱辛即令本場上戶一面兌米出糶即令監轄官具

糶過賑濟米穀報縣本縣以常平米糶錢依市價給還
元兌糶米上戶交領其縣市去置場相近即般運米斛
前去置場處糶濟依已立定船脚支破

施行置場賑糶濟所約束事

契勘賑糶賑濟人戶米穀已下場差官及合干人監轄
外逐場先出榜分定都分先後仍於外門外及裏門外
各依先後資次排定都分上戶坐處

近都先交錢後請
米遠都後交錢先

請米

至日天未明監官入場隅官入交錢位子

隨行人非有號不得入門

保正大保長各將旗號引本都保下輪糶濟人赴場外門依資次旗下座定以監官逐隊叫名保正以旗引保長保長以旗先行賑濟人戶以次詣憲前呈牌隅官以入門印印其左手訖撥入門監官逐隊叫名保正長引賑濟人以次請米訖監官用支米訖印於牌下日子之左以濕布拭去手印即時出門次引賑糶人戶詣憲交錢

上戶米錢

自行交外更不附歷常平米錢縣司差人吏當廳交納

交訖用紅印於歷

內本日合糴米數下之右如錢數不足分明批上實糴之數却付人戶以入門印印其左手入門監官逐隊叫名保正長引賑糴人以次糴米訖監官用糴米訖青印印其歷內交錢印之左仍用濕布拭去手印即時出門一保畢又引一保如前一賑糴人戶逐都各置絹旗一面

面

止用小絹一幅約長二尺各書第幾都字

逐保各置小旗一面

或絹或紙從便各書

第幾都第幾保字

逐場都各各異色保各如其都之色

委官往各場究見元認米數椿管實數

契勘先據星子等三縣官勸諭到管下有力上戶承認賑糶米穀接濟民間食用軍司已籍定姓名認糶數目及行下各令椿管準備將來賑糶切慮其中有椿不及所認之數有悞指準合行委官前去究見各戶見今的實椿管米穀數目如有闕少即請嚴責近限計置椿管數足

再措置場所賑濟孤老人等約束

照對今歲旱傷軍司已行措置賑濟賑糶事件立日式

行下三縣遵守一例施行自來年正月初一日為頭賑
糶賑濟去訖數內合賑糶事件切慮軍司有所未盡兼
賑濟孤老殘疾等人若依每月作六次支給又恐冬寒
趲日分赴場請米不給合行下三縣如所行賑糶事件
未盡請畫條具申軍所有賑濟孤老殘疾等人所請米
次數可改作每月初一日十六日作兩次預行支給庶
幾不至失所

取會諸縣知縣下鄉勸諭佈種如何施行事

使軍契勘先印給文榜發下三縣曉諭鄉民將田土起
時犁翻多種二麥今詢問得除種麥田地外尚有未犁
田地去處稍多及已耕翻田鄉民又不趁時墾殖兼相
去交春日逼切慮農事失時委自知縣躬親下鄉勸諭
鄉民遍行翻犁田土以備來春佈種如使軍不測差官
前去點檢得再有未翻犁去處必定勾追有違約束之
人重行斷罪先具已如何施行狀申

再行下三縣勸諭到上戶賑糶不許抵拒事

契勘今歲旱傷細民闕食已行下都昌縣勸諭到上戶
承認賑濟米穀數目申軍使司亦已行下本縣將勸諭
到上戶米穀數目照應置場處戶口多寡分撥付逐場
出糶務要均平切慮其間上戶抵拒官司不即依從分
撥即仰具姓名申軍

行下米場人戶不到者於總簿用印

照對今歲本軍管屬旱傷已行關防約束行下三縣自
來年正月為頭賑糶賑濟去訖所有賑糶米日分人戶

赴場糶米不及仰監糶官即時用不到印子於總簿姓名下印訖為照合行仍關報逐場

行下米場具糶過米式

照對本軍官屬今歲旱傷已據星子都建昌縣勸諭到上戶承認賑糶米穀數目申軍使司亦已措置關防置場差官下縣監轄自今年正月為頭賑糶賑濟去訖所有各縣合五日一次遇糶米日分具糶過米數文帳二本申縣本縣繳連一本申軍今立式下項

某處賑糶場

今具某月某日糶過米數下項

一本場本日合糶人戶計若干共糶米若干

大人若干合糶若干

小兒若干合糶若干

一本日實到糶米人戶若干共糶過上戶某人米若干

如是糶官米即說官米

大人若干糶過米若干

小兒若干糴過米若干

一比合糴米數不到人戶若干少糴米若干

大人若干合糴米若干

小兒若干合糴米若干

右謹具申聞

淳熙八年正月初二日

施行場所未盡抄劄戶

照對本軍管屬星子都昌建昌縣旱傷已行下各縣委
官抄劄到闕食戶口人數自今年正月為頭賑糴賑濟

近據人戶前來投陳係漏落抄劄不盡本軍未見着實
難便施行今出榜賑糶濟場曉示如有不濟戶當來漏
落未曾抄劄即仰具狀經本場巡察官陳理從本官見
着實如委係闕食即仰一面賑糶具姓名保明申軍其
間或有稅產得過人戶以乞賑濟為名意在避免賦役
輒敢妄冒煩紊官司罪當追治

措置行下各場關防上戶用濕惡糙米

照對本軍旱傷已行下三縣勸諭管下上戶承認米穀

賑糶軍司已行措置關防約束置場差官下縣監轄賑
糶外切慮其間有上戶却將濕惡麤米穀赴場出糶
有悞民間食用合行下三縣如有上戶津般到濕惡麤
糙穀米即仰退回令上戶津般堪好米穀出糶不得容
令作弊并印榜曉示

續置歷下場五日一次開具糶過米

照對本軍管屬旱傷細民闕食已行下三縣勸諭到上
戶承認賑糶米穀數目申軍使司已關防措置約束事

件置場給歷下縣付人戶差官監轄自今年正月為頭
每五日一次賑糶切慮其間尚有人戶不能措辦五日
錢一頓收糶合續添賑糶歷一本立式行下三縣關報
逐場如有人戶願日赴場收糶米斛者即仰費元立歷
頭赴巡察官粘連印押付人戶逐日收糶其有人戶願
依前五日一次赴場收糶者即仰依已行事件施行仍
五日一次開具糶過米穀文帳供申

行下普作賑濟兩日

契勘本軍管屬旱傷尤甚細民闕食已行下三縣抄劄到闕食戶口人數申軍及勸諭到上戶張世亨等四名依格承認賑濟米共一萬九千石及依條取撥常平義倉米自淳熙八年正月以後緣管屬寒雪本軍行下屬縣將賑糶人戶一例賑濟兩日

正月八日帖都建昌縣

再諭上戶借貸米穀事

契勘本軍管屬去歲旱傷已行下星子等三縣勸諭上戶以所收米穀賑糶除認數外有餘剩米穀并不係勸

諭賑糶米穀人家遞年多是春間將米穀等先放下戶
秋冬隨例收息今來上戶以旱傷之故慮恐下戶將來
負欠不還官司不為受理仍以官司勸諭為詞不肯
放使下戶用乏失業不便使司今準淳熙四年十二月
初三日指揮節文諸人戶賒糶米令欠戶還米本外每
斗收息五升其先放約秋成計本息還錢亦合一體施
行如有拖欠不還官為理索所貴兩無虧損合行下三
縣散榜勸諭約束施行

再委官體訪場所合干人減剋等事

契勘本軍管下去歲旱傷已行下三縣勸諭到上戶賑糶米穀使司遂措置委官下縣分場監轄賑糶濟及帖縣官分定地頭巡察去訖切慮各縣逐場監糶濟官容縱合干等人減剋升斛及容上戶將砂土碎截濕惡空穀米穀赴場中糶濟及巡察官不即前去巡察事屬不便就委官前去體訪如有似此違戾去處即具狀供申
申監司為賑糶場利害事件

契勘本軍并管屬諸縣去歲旱傷至甚細民闕食切慮
人戶逃移失業遂多方勸諭上戶賑糴米穀并將見管
常平米數行下分定置場去處官吏監轄糴濟應接細
民食用今有下項利害事件合申諸監司

除本軍勸諭上戶椿管米數并於外州和糴及常平米
糴濟應接管內細民食用外近來續據人戶陳訴當來
抄劄漏落姓名及隣路州軍流民前來逐食又不免行
下管屬多方存卹相度賑濟所費米斛比之元來計度

數目大改增添而向去小熟日子尚遠切慮所椿米穀不能周給無可接續糶濟却致民間缺食事屬不便乞即撥米二三萬石應副接續糶濟如蒙允許即乞早賜行下取撥去處以憑差撥人船前去搬取

本軍昨準淳熙七年九月十三日敕中書門下省檢會昨準乾道七年八月一日指揮立定勸諭上戶賑糶濟格目給降付身補授名目內無官人一千五百石補進

義校尉

願補不理選限將仕郎者聽

二千石補進武校尉

如係進士免文解一

次不係進士候到
部與免短使一次

四千石補承信郎

如係進士與
補上州文學

五千

石補承節郎

如係進士
補迪功郎

如是賑糶依此減半推賞又準

淳熙七年十月八日指揮節文賑糶米於市價減半錢

數即照已降指揮推賞

本軍即已備坐行下管屬勸諭只據上戶張世亨張邦

獻劉師輿黃澄四名承認依格賑濟本軍已行具奏及

申諸監司照會賑糶一事至今尚未有申到承認應格

之人蓋緣本軍地瘠民貧除上項四家賑濟之外未有

出得上件米穀減半出糶之人是到所認米穀數目不
多有闕賑糶欲乞詳酌所申特賜數秦乞將上戶承認
賑糶米價止令量減四分之一便與依格推賞却於所
得官資比折錢數量展磨勘之類早賜行下勸諭增認
庶使上戶樂於就賞細民不致闕食

今照管屬近來不住有外州縣飢民流移入界本軍已
行下諸縣存卹及委自當職官勸諭上戶收充佃客借
與空閒屋宇許令請佃係官田土給與種糧趁春開耕

如向去豐熟外州縣稅戶前來識認官司不得受理如
今來所招佃客將來裏私搬走回鄉即許元贍養稅戶
經所屬陳理官為差人前去追取押回斷罪交還及散
榜鄉村遍行曉示外欲乞詳酌更申朝省明降指揮行
下庶幾州縣有所遵守不惟安集流民免致失所亦使
開闢曠土供納稅賦實為利便

申提舉司借米付人戶築陂塘

照對管屬星子等三縣去歲旱傷尤甚緣田段多是高

仰見管陂塘多是穿漏是致旱死不住據管屬星子都
昌建昌人戶經官陳乞借口糧修築陂塘本軍行下逐
縣委自知縣躬親前去管下逐一驗視所管陂塘如有
穿漏及開掘即仰一面計度合用工數供報提舉司乞
支撥米斛已蒙提舉衙回牒指揮支撥保借常平司六
百五十四石

施行闕食未盡抄劄人等事

照對本軍管下三縣諸鄉保正當來受情不行依公抄

劄關食人戶多將得過隱實之人抄作關食其實是關
食人戶却不抄劄未欲便行追究合行約束

仰隅官保正照應本縣巡察官所行事理須管從實隨
門再行審實抄劄關食人戶若保正依前減裂不即同
隅官抄劄及將元冒濫人蓋庇或在鄉乞覓人戶分文
錢物仰隅官具狀陳訴切待追究重作施行

有當來不應抄劄隱實有營運物業之家及上戶自能
贍給地客見執使軍歷頭之人仰隅官保正追收繳納

若顏情蓋庇不即追納別致人戶陳訴或覺察得知必
定重作行遣

有妻是闕食人戶隅官保正不為抄劄或保正等乞覓
搔擾仰被擾人戶不拘早晚赴本軍陳告切待重作行
遣

有得過人戶妄稱闕食陳乞給歷紊煩官司之人定當
追收赴軍重斷

有合追收元給文歷人戶輒敢倚恃猾健訟把持不伏

追收仰隅官保正具狀陳訴切待重作行遣

仰屬縣逐鄉隅官保正從實再行審實抄劄到闕食人戶切待委官躬親下鄉隨門審實如再有不實仍前泛濫去處必定追收犯人赴軍定送獄根勘情弊施行

審實糶濟約束

照對已行帖逐縣審實糶濟事件切慮各鄉隅官保正不依所行約束別致引惹詞訴事屬不便合帖屬縣再行約束開具供申

各鄉有營運店業興盛之家其元給歷頭合行追取若雖有些小店業買賣微細不能贍給已請歷頭不合追回如有似此未係抄割之人亦請令隅官保正從實根括施行毋致泛濫

各鄉上戶地客如主家自能贍給其元給歷頭合行追收如主家見自闕食不能贍給雖是地客亦合給歷如有似此之人即請隅官保正從實根括毋致泛濫

各鄉人戶如將戶名及第行重賚請去歷頭合行追回

如是只用第行雖不用戶名實非重疊其已請歷不合
追取人戶已請歷頭如有虛增口數今來覈實合行減
退即請於歷頭并總簿內分明改正

縣市

一上等有店業日逐買賣營運興盛及自有稅產贍給
不合請給歷頭人戶若干

開具坊巷逐戶姓名大小口數

一中等得過之家并公人等合赴縣倉糴米人若干

開具坊巷逐戶姓名大小口數

一下等貧乏小經紀人及雖有些小店業買賣不多并極貧秀才合請歷頭人戶若干

開具坊巷逐戶姓名大小口數

施行權免和糴令客米從便往來

本軍旱傷遂支撥官錢委官在軍置場和糴客人米斛循環糴糴應接民間食用及本軍勸諭到上戶承認糴米斛并差公吏前去收糴到米斛椿管賑糴濟不闕所

有元置和糶賑糶場合權行住糶客人米斛及出榜曉示從便上下出糶

免糶客米三分

照對本軍去歲旱傷細民闕食遂行措置場和糶客旅米斛三分應接食用今來賑糶濟米數不闕已行住糶合行散榜上流州軍客旅通知

旅行許令人戶借貸官司米穀充種子佈種

照對管下三縣去歲旱傷至重本軍已行措置賑糶賑

濟近來節次據人戶經軍陳狀因旱傷目今佈種是時
闕少種糧乞行借貸常平米斛佈田軍司已行下各縣
相度依條施行去訖未據申到今檢準常平免役令諸
災傷計一縣板稅七分以上第四等以下戶乏種食者
雖舊有欠閣不以月分聽結保貸借米穀不堪充種子
紐直以錢各二貫石給限半年隨稅納仍免息利豫以
應支數保明申提舉司行訖申尚書戶部

雖計一縣放
稅不及七分

而本戶稅及
七分者準此

今來除星子知縣一面究實相度依條借貸外所有都建昌縣合委官同各縣知佐相度究見管下第四等以下戶委實闕乏之人各令結保依條施行

不係賑濟人一例賑濟

契勘去歲旱傷細民闕食使軍已行勸諭到上戶承認糶濟米穀及有上戶自能贍給佃地客戶口外使軍已印牌歷付闕食人赴場賑糶濟除將見有牌歷合糶濟人戶普行賑濟外其上戶贍給地佃等日前除豁不係

賑糶之人亦行抄劄一例賑濟一十三日自三月十一日為頭將張世亨等所認米及取撥常平米普行賑濟務要實惠

行下各縣抄劄戶口并立支米穀正數

契勘所支賑糶米緣三縣各鄉間有數戶抄劄口數太多恐未盡實合委官與縣官評議豫將所支米穀立定正數賑濟施行二十口以上每戶支穀止於五石

二十口以下十五口以上每戶支穀止於四石二十五

口以下計口計日支給如管穀四石以上所支亦止於四石

都昌縣搬張劉二家米等事

照對都昌縣止勸諭到黃澄一名承認賑濟米五千石
湊所管義倉米會計賑濟不周本軍遂行下建昌縣於
張世亨劉師興賑濟米內取撥四千石付都昌縣賑濟
其合用僱舟水腳錢每石支錢三十五文省并每石支
搬腳錢四十文足今張劉二家差人搬擔就官請領僱

錢並經都昌縣所管常平米錢內支破

諸縣得米人戶依時佈種等事

使軍近行下諸縣但係元給牌歷賑糶賑濟民戶並以
勸諭到張世亨黃澄劉將仕米及義倉米並行賑濟半
月仰得米人戶併力及時耕種田土如合干人減尅不
行盡實給數即仰人戶徑赴使軍陳訴切待根究重作
施行

行下各場普濟半月外照約束接續

照對本軍近將勸諭到上戶黃澄張世亨等賑濟米斛
自今年三月一日為頭普行賑濟通作一十五日今來
相次了畢所有元勸諭到上戶承認賑糶米斛合行依
使軍先來約束接續賑糶應接細民食用

委官覈實四戶賑濟米數縣官保明事

照對去歲旱傷細民闕食勸諭到都昌建昌縣上戶張
世亨等四名共賑濟米一萬九千石本軍遂行措置相
度地里遠近分作三十五場委官監轄賑濟及委官巡

察近準尚書省劄子檢會淳熙八年正月二十三日勅
中書門下省勘會兩浙江東西湖北淮西州軍去年間
有旱傷去處檢坐乾道七年內立定勸諭富室上戶賑
濟賑糶米斛賞格已降指揮行下逐路施行近來逐路
州軍雖有開具已勸諭到賑濟賑糶數目緣無逐司保
明是致推賞未得切慮因而滯留未稱勸賞之意正月
二十三日三省同奉聖旨令逐路安撫轉運提舉司各
行下所部州縣將願出穀賑濟賑糶之家如有見得數

目應格合行推賞即日下縣結罪保明申州州結罪保明申逐司仍仰逐司疾速連銜保明申尚書省不得少有稽滯今有張世亨等所認賑濟米斛已行普濟管下闕食人戶相次了畢未見逐縣知縣結罪保明申軍施行今帖委司法前去建昌都昌縣覈實的確賑濟米穀數目結罪保明供申切待再行稽考施行

移文江西通放客米及本軍糴米船事

契堪本軍管屬去歲旱傷細民闕食及無軍糧支遣本

軍節次借撥官錢五萬三百四十四貫三百七十九文
差撥公吏前去江西得熟州軍收糴到米共二萬三千
五百二石二斗四升五合回軍賑糴及支遣軍糧并檢
準淳熙令諸米穀遇災傷官司不得禁止搬取及近降
指揮州縣不許閉糴如有遏糴州軍許隣州越訴又準
今年八月十九日聖旨指揮節文江東安撫使陳少保
奏今歲災傷先合措置通放米斛州縣遏糴去處許人
戶經本司越訴遂移文江西轉運司安撫司并奉新縣

等通放米船回軍賑糴支遣軍糧施行

節次差公吏收糴并撥錢下賑糴場

軍資庫錢共二萬一千三百六十二貫八百九十六文
四千貫文省差劉京手分廬文彬管押於去年七月十
六日前去隆興府管下常池市收糴到米二千三百一
十六石九斗六升於八月二十一日到建昌縣交卸賑
糴

四千貫文省差衙前楊發手分朱湊於去年七月十八

日前去隆興府管下進賢縣收糴到米一千九百二十
一石八斗一升并穀一百五十八石五斗至十月初九
日回軍城下省倉交量米七百九十石都昌縣交量米
八百二十一石三斗一升星子縣交量米三百一十石
五斗穀一百五十八石五斗

一百七十一貫二百文省揆依折帛錢共四千貫差衙
前呂祺手分熊瑜管押於去年七月二十九日管押前
去收糴

二千貫省差衙前呂棋往隆興府管下奉新縣收糴到
米七百四十九石六斗於三月十一日回軍

九千八十二貫一百一十九文省於去年八月二十五
日已後節次支付在賑糴場收糴米係在後項聲說

正支錢二千七百一十二貫文

轉支收到公吏糴米剩到錢共六千二百七十貫一百
一十九文

四百八十貫七十七文省係轉支糴米回納錢付楊發

收糴其米在後項聲說

一千貫文省支付米彥俊糴米其米在後項聲說

一千六百二十九貫五百文省湊折帛錢共四千貫付衙前謝安道職級高宗選管押於去年七月二十九日往下項去處收糴共一千八百二十六石一升五合於十一月初八日回軍隆興府奉新縣糴到米一千一百六十九石五斗六升五合淮南蘄州糴到米六百五十六石四斗五升折帛錢共二萬八千九貫二百一十文

省係淳熙五年六年錢

一千三百七十貫五百文省係六年分支付謝安道高
宗選收糴米其共糴到米已在前項聲說

二千八百二十八貫八百文省係六年分錢付呂祺熊
瑜收糴米其米已在前項聲說

四千八百八十九貫九百一十文省付在軍賑糴場收
糴米係在後項聲說

五千貫係七年分錢差衙前孫燾職級江彥和管押於

十一月二十五日往隆興府拏湖收糴到米二千二百九十七石一斗六升於今年正月二十三日回軍

五千貫文省差職級朱彥俊管押揆前項共六千貫文省於十一月二十三日往江西吉州收糴共二千八百五十石於今年三月二十九日回軍

差撥乳香度牒糯米本錢共八千八百九十二貫二百

七十三文省

閱

四千貫差衙前王邦翰手分蔣安禮管押於八月十五

日往隆興府管下常湖收糴米一千九百三十二石八斗九升至十一月二十四日回軍

四千四百二十九貫二百七十三文省揆作前項錢共四千九百九貫三百五十文省管押於十二月初一日往隆興府奉新縣收糴二千三百闕

奏乞推賞賑濟上戶

照會本軍去歲旱傷至重細民闕食撥到常平米斛數目不多隨行勸諭到管屬上戶承認米數本軍恭稟行

下管屬再行勸諭如願將米賑濟切依所降指揮格法
推賞去後今勸諭到元認賑糴米稅戶張世亨劉師興
進士張邦獻黃澄四名遵法賑濟內建昌縣稅戶張世
亨五千石乞補承節郎進士張邦獻五千石乞補迪功
郎稅戶劉師興四千石乞補承信郎并都昌縣待補太
學生黃澄五千石乞補迪功郎及差官監轄賑濟已於
去年十二月二十八日先具奏聞及申本路諸監司照
會去訖續據管屬星子都昌建昌三縣共抄劄闕食饑


民二萬九千五百七十八戶數內大人一十三萬七千六百七口小兒九萬二百七十六口本軍各仰給歷頭牌面置簿歷發送逐縣當職官給散付人戶預於縣市及諸鄉均定去處共置三十五場分見見任寄居指使添差監押酒稅監廟等大小使臣共三十五員監轄賑糶賑濟及委縣官分場巡察嚴戢減尅乞覓之弊自淳熙八年正月初一日為始今抄劄到闕食人戶赴場賑糶其鰥寡孤獨之人即以常平米斛依法賑濟至正月

內又緣雪寒行下屬縣將元係賑糶饑民用上件張世亨黃澄等及常平義倉米一例賑濟兩日至三月內又慮饑民難得錢收糶米斛再自十一日為頭行下諸縣將已給歷賑糶饑民一例普行賑濟一十三日通作半月又照約都昌縣止有黃澄一名承認賑濟五千石湊所管義倉米會計賑濟不周本軍遂於建昌縣張世亨等賑濟米內撥米四千石本軍措置官錢和雇夫脚舟船裝發送都昌縣交管分於場置去處責令監轄賑濟

至閏三月十五日終節次據都昌縣建昌縣申到張世
亨張邦獻劉師輿黃澄賑濟過米撮等共計一萬九千
石星子縣元無勸諭到上戶賑濟米斛即以常平義倉
米斛依例普行賑濟外本軍節次行下都昌建昌知縣
逐旋審究的實賑濟過張世亨黃澄等米數保明申軍
去後據迪功郎監城下酒稅權都昌縣事孫僑通直郎
知建昌縣事林叔坦狀保明到張世亨張邦獻劉師輿
黃澄賑濟過米一萬九千石委是節次賑濟饑民食用

之數並無冒濫本軍一面委差從政郎本軍司法叅軍
陳祖永前去都建昌縣覈實得張世亨張邦獻劉師興
黃澄賑濟米一萬九千石委是賑濟過的實之數本軍
再行稽考別無冒濫保明是實本軍勘會得張世亨劉
師興各係稅戶張邦獻係應舉習詩賦終場士人并黃
澄係於淳熙四年秋試應舉習詩賦取中待補太學生
第十五名是實其張世亨張邦獻劉師興黃澄賑濟過
米數各應得近降指揮賞格數內稅戶張世亨賑濟過

米五千石合補承節郎稅戶劉師興賑濟過米四千石
合補承信郎進士張邦獻賑濟過米五千石合補迪功
郎待補太學生黃澄賑濟過米五千石合補迪功郎除
已具申本路安撫司轉運司提舉司提刑司照會依條
保奏推賞外欲望聖慈下所屬給降合得付身發下以
憑給付張世亨等祇受謹錄奏聞



晦庵別集卷七